

МОНГОЛ УЛСЫН ҮНДЭСНИЙ БАТЛАН ХАМГААЛАХЫН ИХ СУРГУУЛИЙН  
БАКАЛАВРЫН БОЛОН МЭРГЭЖЛИЙН БОЛОВСРОЛЫН ХӨТӨЛБӨРТ ЭЛСҮҮЛЭХ  
ЭЛСЭЛТИЙН ЖУРАМ

**Нэг. Ерөнхий зүйл**

1.1. Бакалаврын хөтөлбөр:

ҮБХИС-ийн бакалаврын хөтөлбөрүүд нь иргэний болон цэрэг, батлан хамгаалахын гэсэн үндсэн хоёр чиглэлийн сургалтыг хамааруулна.

**Иргэний чиглэлээр:** - Аюулгүй байдлын сургуульд байгаль, нийгмийн ухаанд суурилсан авто инженер, нийтийн удирдлага, эдийн засаг, менежмент, олон улсын харилцаа, системийн аюулгүй байдал, утасгүй холбоо, цахилгаан холбоо, электроник зэрэг үндсэн хөтөлбөрүүд, мөн түүнчлэн хэрэглээний математик, хими технологи, барилга инженерийн байгууламж, автозамын барилга, уул уурхайн машин механизмын ашиглалт, барилга замын машины ашиглалт, усны эрэл, хайгуул, ус хангалтын инженер зэрэг хавсарга хөтөлбөрүүдээр, Цэргийн хөгжмийн сургуульд хөгжмийн урлаг хөтөлбөрөөр тус тус бакалаврын боловсрол олгоно. Иргэний чиглэлийн хөтөлбөрүүдэд эмэгтэй элсэгчдийн эзлэх харьцаа 30 хүртэл хувь байж болно. Бакалаврын боловсрол эзэмшигч эрэгтэй оюутнууд нь “Цэргийн албаны тухай” Монгол Улсын хуулийн дагуу суралцах хугацаандаа цэргийн мэргэжлийн сургалтад хамрагдаж хугацаат цэргийн алба хаасанд тооцогдож цэргийн нэгдүгээр зэргийн бэлтгэл үүрэгтнээр бүртгэгдэнэ. Цэргийн мэргэжлийн сургалтад хамрагдах оюутан нь бие бялдар, эрүүл мэндийн хувьд хугацаат цэргийн албанд тавигдах шаардлагыг хангасан байна. ОХУ, БНХАУ, ХБНГУ, ТУРК УЛС, БНЭУ, ЯПОН УЛС, БНСУ зэрэг арав гаруй орнуудтай байгуулсан гэрээний дагуу БХЯ, ЗХЖШ-аас ирүүлсэн захиалгыг үндэслэн “Инженерийн бэлтгэл” ангид суралцуулах зорилгоор элсэгчдийн хяналтын тоог нэмэгдүүлэх арга хэмжээг тухайн нөхцөл байдалд нийцүүлэн захирлын тушаалаар авч хэрэгжүүлнэ.

**Цэрэг, батлан хамгаалахын чиглэлээр:** - Зэвсэгт хүчин, төрийн цэргийн бусад байгууллагын офицерийн албанд ажиллах хүсэл, эрмэлзэлтэй, ҮБХИС-ийн Аюулгүй байдлын сургуульд 2 жилийн хугацаанд байгаль, нийгэм, хүмүүнлэгийн ухааны ерөнхий суурь, мэргэжлийн суурь хичээлийн бүлэг хөтөлбөрүүдийг бүрэн судалсан, сурлага, төлөвшил, бие бялдын тусгай шаардлага, гадаад хэлний зохих бэлтгэл хангасан оюутныг Цэргийн нэгдсэн сургуульд шилжүүлэн суралцуулж төрийн цэргийн байгууллагуудын мэргэжил, хяналтын тоо, захиалгын дагуу цэргийн ухааны бакалаврын зэрэг олгож төгсгөнө.

1.2. Мэргэжлийн боловсролын хөтөлбөр:

а. Цэргийн хөгжмийн сургууль /ЦХС/ нь хөгжимдөх урлаг / мэргэжлийн боловсрол/-ийн хөтөлбөрт Ерөнхий боловсролын сургуулийн 9 дүгээр анги төгссөн хөгжмийн авьяастай сурагчдыг элсүүлэн 4 жил цэргийн үлээвэр хөгжмийн сурагчаар суралцуулж, дипломын боловсрол бүхий хөгжимчин ахлагчаар төгсгөнө.

б. Ахлагчийн сургууль /АС/ нь цэргийн зэвсэглэл, техник, тусгай тоноглол, төхөөрөмжийн чиглэлээр мэргэжлийн боловсрол олгох хөтөлбөрт 22 хүртэлх насны иргэдийг элсүүлэн суралцуулж цэргийн мэргэжил эзэмшүүлэн Зэвсэгт хүчний ахлагчийн албанд шилжүүлнэ.

1.3. ҮБХИС нь БСШУС-ын сайдын баталсан дээд боловсролын сургалтын байгууллагад “Оюутан элсүүлэх журам”, “Үндэсний батлан хамгаалахын их сургуулийн дүрэм”, “ҮБХИС-д боловсролын бакалаврын зэрэг олгох сургалтын журам” болон энэхүү журмыг удирдлага болгон элсэлтийг зохион байгуулна.

1.4. ҮБХИС-д элсэхээр бүртгүүлэгч, элсэгч болон элсэлтийн комиссын үйл ажиллагааг энэ журмаар зохицуулна.

1.5. ҮБХИС-ийн бакалаврын болон мэргэжлийн боловсрол олгох хөтөлбөрт элсэхээр хүсэлт гаргасан иргэнийг “бүртгүүлэгч”, зохих болзол хангаж элсэлтийн хяналтын тоонд багтсан бүртгүүлэгчийг “элсэгч”, Онлайн бүртгэлийн системийг “бүртгэлийн систем”, элсэлтийг зохион байгуулахаар томилогдсон төв болон бакалаврын, мэргэжлийн боловсролын хөтөлбөрийн комиссыг “элсэлтийн төв болон салбар комисс”, элсэлтийн үйл ажиллагаанд оролцох ажилтныг “комиссын гишүүн” гэнэ.

1.6. Энэхүү журмыг ҮБХИС-ийн <http://mndu.gov.mn/elselt/>, <http://mndu.gov.mn> болон Боловсролын үнэлгээний төвийн <http://www.eec.mn> хаяг, цахим болон төвийн хэвлэл, мэдээллийн хэрэгсэлд байршуулан, бүртгүүлэхийг хүсэгчдэд танилцах нөхцөл боломжийг бүрдүүлнэ.

1.7. Журмын хэрэгжилтэд төрийн захиргааны төв болон бусад байгууллага, олон нийт, эцэг, эхийн төлөөлөл, ҮБХИС-ийн удирдлагын зүгээс хөндлөнгийн хяналт тавих нөхцлийг бүрдүүлсэн байна.

1.8. Улаанбаатар хотод явагдах элсэлтийн үйл ажиллагааг БСШУСЯ-аас албан ёсоор тогтоосон өдрөөс эхлэн ажлын 10 өдөрт багтаан зохион байгуулна.

1.8. Бакалаврын хөтөлбөрийг хэрэгжүүлэгч нь Цэргийн нэгдсэн сургууль, Аюулгүй байдлын сургууль, Цэргийн хөгжмийн сургууль, мэргэжлийн боловсрол олгох хөтөлбөрийг хэрэгжүүлэгч нь Цэргийн хөгжмийн сургууль, Ахлагчийн сургууль байна.

### Хоёр. Бүртгүүлэгчдэд тавих шаардлага

2.1. Элсэхээр бүртгүүлэгч нь өөрийн хүсэл сонирхол, итгэл үнэмшлээрээ сонголтоо хийсэн, бие бялдрын болон гадаад хэлний шаардлагыг хангасан, ёс суртахууны зөв хүмүүжил, төлөвшилтэй, суурь өвчингүй, нийгмийн хэв журам, хууль, дүрмийг хүндэтгэн сахиж биелүүлэх талаар өөрийн төлөвшил хандлагыг итгэл үнэмшил болгон эрхэмлэдэг, бүрэн дунд, түүнээс дээш боловсролтой Монгол Улсын иргэн байна.

2.2. Орон нутгаас суралцагч элсүүлэх хуваарьт зөвхөн тухайн аймагт оршин суугаа иргэд, Улаанбаатар хотоос элсүүлэх хуваарьт нийслэл хотод оршин суудаг харьяаллын бүртгэлтэй “Элсэлтийн ерөнхий шалгалт” /ЭЕШ/ өгсөн иргэд бүртгүүлнэ.

2.3. Орон нутагт элсэлтийн ерөнхий шалгалт өгсөн бүртгүүлэгч нь Улаанбаатар хотын элсэлтэд хамрагдах тохиолдолд Боловсролын үнэлгээний төвд бүртгүүлсэн байна

2.4. Улаанбаатар хот элсэгчдийг цахим хэлбэрээр элсүүлнэ.

2.5. Хөдөө орон нутгийн элсэгчдийг бүртгэх үйл ажиллагааг Монголын их, дээд сургуулиудын консорциумаас орон нутагт томилогдсон элсэлтийн комисс зохион байгуулна.

2.6. Бүртгүүлэгч нь сонгосон бүлэг хөтөлбөрт хамаарах элсэлтийн шалгалтын хичээлээр 2017, 2018, 2019 онд ЭЕШ өгсөн аль нэг батламжаар элсэн суралцах эрх эдлэнэ. /Бүртгүүлэгч нь зөвхөн хүчин төгөлдөр нэг батламжаар бүртгүүлэх эрхтэй байна./

2.7. Цахим бүртгэлд амжилттай бүртгэгдсэн, элсэлтийн ерөнхий шалгалтын оноогоороо тухайн сонгосон бүлэг хөтөлбөрийн шаардлагыг хангасан элсэгч сургалтын төлбөрийн 30 хувийг төлж суралцах эрхээ баталгаажуулна.

2.8. Бүртгүүлэгч нь ҮБХИС-д бүртгүүлэхээс өмнө элсэлтийн ерөнхий шалгалтын шалгуулагчийн буланд нэвтэрч, өөрийн хувийн мэдээлэл болон дүнтэй танилцаж, зөрчилтэй асуудал байвал урьдчилан шийдвэрлүүлсэн байна.

2.9. Хөтөлбөрийн онцлогоос хамаарч бүртгүүлэгч нь энэ журмын 4.3-д заасан ур чадварын шалгалт өгнө.

2.10. Бакалаврын болон мэргэжлийн боловсролын хөтөлбөрүүдэд элсэгч нь элсэлтийн шалгалтын хичээл тус бүрээр энэ журмын 4.1-д заасан босго оноог хангасан байна.

Бүлэг	Хөтөлбөр	Элсэлтийн шалгалтын хичээл,	
		I-хичээл	II-хичээл
I	Математик суурьтай хөтөлбөр - I	Математик	Нийгмийн тухай мэдлэг
II	Математик суурьтай хөтөлбөр - II	Математик	Физик
III	Физик суурьтай хөтөлбөр	Физик	Математик
IV	Нийгмийн тухай мэдлэг суурьтай хөтөлбөр	Нийгмийн тухай мэдлэг	Математик
V	Монгол хэл суурьтай хөтөлбөр /Хөгжмийн урлаг/	Монгол хэл	Нийгмийн тухай мэдлэг
VI	Мэргэжлийн боловсрол олгох хөтөлбөр	Математик	Физик

2.11. Бакалаврын болон мэргэжлийн боловсролын хөтөлбөрүүдэд элсэгчдэд **гаж зуршилгүй, биеийн ил хэсэгт сорвигүй, биед шивээсгүй** байх нийтлэг шаардлага тавина. /2017 оны 5 дугаар сарын 17-ны өдрийн Монгол Улсын Засгийн газрын 144 дүгээр тогтоол/

2.12. Сургалт, эрдэм шинжилгээ, спорт, зохион бүтээх инженерчлэлийн чиглэлээр олон улсын хэмжээний олимпиад, уралдаан тэмцээнд онцгой амжилт гаргасан элсэхийг хүсэгчдэд элсэлтийн комиссын шийдвэрээр дэмжлэг үзүүлж болно.

- 2.13. Босго /хэмжээст/ оноо нь хоёр хичээл тус бүрт 700-аас дээш оноотой элсэгчдийг бакалаврын хөтөлбөрийн сургалтын төлбөрөөс 100% чөлөөлөн элсүүлэн суралцуулна.
- 2.14. ЗХЖШ, төрийн цэргийн байгууллагуудын 30 хүртэлх насны ахлагч өөрийн харьяа байгууллагын зөвшөөрлөөр бакалаврын өдрийн хөтөлбөрт элсэхдээ ЭЕШ-ын оноогоороо бусад элсэгчидтэй ижил түвшинд өрсөлдөнө. ЭЕШ-ын шаардлагыг хангаагүй тохиолдолд элсэн суралцах боломжгүй. Элсэн суралцах болзол хангасан нөхцөлд цэргийн жинхэнэ албанаас бэлтгэлээр халагдаж оюутны нэгэн адил эрх, үүрэг хүлээнэ.
- 2.13. Хөгжмийн урлаг хөтөлбөрт ур чадварын шаардлага хангасан, хөгжимчний мэргэжлийн дипломтой, “ЭЕШ”-ын батламжтай 23 хүртэлх насны хөгжимчин ахлагч болон иргэдийг элсүүлэн суралцуулна.
- 2.14. Мэргэжлийн боловсрол олгох хөтөлбөрт 22 хүртэлх насны иргэдийг /эрэгтэй/ элсүүлэн цэргийн тусгай мэргэжил эзэмшүүлнэ. /Энэхүү хөтөлбөр нь төлбөргүй, суралцагчид нь 10 сар суралцах хугацаандаа цэргийн дүрэмт хувцас, байр, хоолоор үнэгүй хангагдана/.
- 2.15. Мэргэжлийн боловсрол олгох хөтөлбөрт элсэгчид **165 см**-ээс дээш өндөртэй, **60 кг**-аас багагүй жинтэй, биеийн ил хэсэгт сорвигүй, биед шивээсгүй байна. /2017 оны 5 дугаар сарын 17-ны өдрийн Монгол Улсын Засгийн газрын 144 дүгээр тогтоол/
- 2.16. Мэргэжлийн боловсрол олгох хөтөлбөрт элсэлтийн шаардлага хангасан хугацаат болон гэрээт цэргийн алба хаагчдыг ЗХЖШ-ын даргын цэргийн албанаас халсан тухай тушаал, анги, байгууллагын албан бичгийг үндэслэн элсүүлэн суралцуулж болно.
- 2.17. Мэргэжлийн боловсрол олгох хөтөлбөрт эмэгтэй иргэдийг элсүүлэн суралцуулахгүй.
- 2.18. Гадаад улсад бүрэн дунд боловсрол эзэмшсэн Монгол Улсын иргэнийг Боловсролын асуудал эрхэлсэн төрийн захиргааны төв байгууллагын элсэлтийн ерөнхий шалгалттай дүйцэх шалгалт өгсөн тухай тодорхойлолтыг үндэслэн элсүүлнэ.

### Гурав. Элсэлтийн бүртгэл

- 3.1. Элсэлтийн бүртгэлийг орон нутагт Монголын их, дээд сургуулиудийн консорциум тусгай журам, хуваарын дагуу, Улаанбаатар хотод цахим хэлбэрээр <http://mndu.gov.mn/elselt> хаягаар явуулна.
- 3.2. Улаанбаатар хотод элсэлтийн цахим бүртгэл **2019** оны **06** дугаар сарын **17-ны** өдрийн **09.00** цагт эхэлж, **06** дугаар сарын **24-ны** өдрийн **18.00** цагт дуусгавар болж хаагдана.
- 3.3. Бүртгүүлэгч системд ЭЕШ-ын бүртгэлийн дугаар, нууц үгээ оруулснаар элсэх хүсэлтээ гаргана.
- 3.4. Системд амжилттай нэвтэрсэн үед системээс бүртгүүлэгчийн хувийн болон ЭЕШ-ын мэдээллийг дэлгэцэнд харуулах ба хүндрэлтэй асуудал үүссэн тохиолдолд элсэлтийн комисс болон Боловсролын үнэлгээний төвд хандаж шийдвэрлүүлнэ.
- 3.5. Хувийн мэдээллийг баталгаажуулсны дараа сонирхсон хөтөлбөрийнхөө талаарх дэлгэрэнгүй мэдээллийг авах боломжтой.
- 3.6 Системд хувийн мэдээлэл, ЭЕШ-ын бүртгэлийн дугаар, нууц үгээ буруу оруулснаас болж үүсэх асуудлыг элсэлтийн комисс хариуцахгүй болно.

### Дөрөв. Элсэгчийг шалгаруулах

- 4.1. БСШУС-ын сайдын 2019 оны А/218 дугаар тушаалаар **2019-2020** оны бакалаврын хөтөлбөрт элсэгчдийн элсэлтийн сонгон шалгаруулалтын босго оноог **480-аас дээш** байхаар тогтоосон. МИДСК-ын элсэлтийн төв комиссын анхдугаар хуралдаанаас элсэлтийн ерөнхий шалгалт өгсөн хоёр шалгалтын тухайн хөтөлбөрт тохирох аль нэг шалгалтын оноо нь **480** ба түүнээс дээш, дараагийн шалгалтын оноо нь **400** ба түүнээс дээш оноог хангаж байх нөхцөлд бакалаврын зохих хөтөлбөрт бүртгүүлэх нөхцлийг бүрэн хангана гэж тогтоосон. Цахим бүртгэлд бүртгэгдсэн элсэгчдийг элсэлтийн хоёр шалгалтын нийлбэр онооны дарааллаар байр эзлүүлэн ҮБХИС-ийн элсэлтийн журмын хавсралтад заасан тухайн хөтөлбөрт элсүүлэх хяналтын тоонд багтсан тохиолдолд элсүүлэн авна. Жишээ нь: Матемтик-1 суурьтай эдийн засгийн хөтөлбөр сонгосон элсэгчийн математикийн шалгалтын оноо нь **480**, нийгмийн тухай мэдлэг шалгалтын оноо нь **410** гэвэл нийлбэр оноо нь **890** оноо болно. Гэхдээ тухайн эдийн засгийн хөтөлбөрт элсүүлэх хяналтын тоо 30 гэвэл тухайн элсэгч **890** оноогоороо **31-д** жагссан тохиолдолд элсэлтийн хяналтын тоонд багтах боломжгүй болно гэж ойлгоно.
- 4.2. ҮБХИС-ийн мэргэжлийн боловсрол хөтөлбөрөөр Ахлагчийн сургуульд элсүүлэх математикийн болон физикийн хоёр шалгалтын оноо нь тус бүрдээ **480-аас** дээш байх тохиолдолд бүртгүүлэх боломжтой болно. Эдгээр онооны нийлбэр нь **960-аас** дээш байх бөгөөд нийлбэр онооны дарааллаар байр эзлүүлэн хяналтын тоонд багтаан тэнцүүлнэ.
- 4.3. Мэргэжлийн боловсрол олгох хөтөлбөрт (АС, ЦХС-д) Улаанбаатар хотоос элсэгчдийг **2019** оны **06** дугаар сарын **25-ны 08.00** цагаас эхлэн Цэргийн төв эмнэлгийн цэргийн нарийн мэргэжлийн эмч нарын эрүүл мэндийн үзлэгт хамруулна. Эрүүл мэндээр тэнцсэн элсэгч ур чадварын шалгалт өгнө.
- 4.4. Дараах хөтөлбөрүүдэд ур чадварын нэмэлт шалгалт авна. Үүнд:

- Хөгжмийн урлаг хөтөлбөрт элсэгчдээс сонсгол болон хөгжимдөх ур чадварын шалгалт авч, эдгээр ур чадварыг **70** хувиас **100** хувийн амжилт үзүүлбэл тэнцэх шалгуурыг хангасан гэж үзнэ.

- Ахлагчийн сургуулийн мэргэжлийн боловсрол олгох хөтөлбөр, Хөгжмийн урлаг болон үлээвэр хөгжмийн хөтөлбөрт элсэгчдээс ур чадварын шалгалтыг **2019** оны **06** дугаар сарын **27**-ны өдрийн **09.00** цагт ҮБХИС дээр авна (шалгалт авах байр, танхимыг бүртгэлийн үед мэдэгдэнэ). Шалгалтын дүнг **06** дугаар сарын **27**-ны өдрийн 16.00 цагт системд байршуулж нийтэд мэдээлнэ.

- Орон нутагт аймгийн Засаг даргын тамгын газрын дэргэдэх Цэргийн штабаас эрүүл мэндийн үзлэг, бие бялдрын шалгуур үзүүлэлт, биеийн тамирын шалгалт авч тэнцсэн иргэдийг орон нутгийн элсэлтийн комисст хүлээлгэн өгнө.

#### МЭРГЭЖЛИЙН БОЛОВСРОЛ ОЛГОХ ХӨТӨЛБӨРТ ЭЛСЭГЧДИЙН ӨГӨХ БИЕ БЯЛДРЫН ШАЛГУУР ҮЗҮҮЛЭЛТИЙН НОРМАТИВ

№	Бие бялдарын чанарууд	Дасгалын төрөл	Аргачлал	Тэнцүүлэх үзүүлэлт
1.	Хүч	Дүүжинд суниах	Тоо	12-оос дээш
2.		Гэдэсний таталт	Тоо	56-аас дээш
3.	Тэсвэр	3000 метрт гүйх	мин	12.30-аас дотогш
4.	Хурд	100 метрт гүйх	сек	15.0-оос дотогш

*Тайлбар: Дээрх 4 үзүүлэлтийн 3 ба түүнээс дээш дасгалыг биелүүлсэн тохиолдолд тэнцэнэ. 100 метр, 3000 метрийн гүйлтийн аль нэг дасгалд заавал тэнцсэн байвал зохино.*

4.5. Онооны дарааллаар хөтөлбөр бүрээр цуваагаар байр эзлүүлж, хяналтын тоонд багтсан элсэгчдийн нэрсийг мэдээлийн самбарт байршуулна.

4.6. Цэргийн нарийн мэргэжлийн эмч нарын үзлэгээр эрүүл мэндээр тэнцэхгүй нь тогтоогдсон, мөн бие бялдрын бэлтгэлжилтийн шалгуур үзүүлэлтийг хангаагүй элсэгчдийг жагсаалтаас хасч, онооны дарааллаар дараагийн бүртгүүлэгчид сонголтыг шилжүүлнэ.

#### Тав. Элсэгчээр бүртгэх

5.1. Улаанбаатар хотоос бакалаврын хөтөлбөрт тэнцсэн элсэгчдэд **2019** оны **06** дугаар сарын **26,27**-ны өдрийн, мэргэжлийн боловсрол олгох хөтөлбөрт элсэгчдэд **06** дугаар сарын **28**-ний өдрийн **08.00-17.00** цагт “ҮБХИС-д суралцах эрхийн бичиг” олгоно.

5.2. **Заасан хугацаанд ирж, суралцах эрхийн бичгээ аваагүй бүртгүүлэгчийг суралцахаас татгалзсанд тооцож онооны дарааллаар дараагийн элсэгчид сонголтыг шилжүүлнэ.**

5.3. Бүртгүүлэгч нь эрхийн бичиг авахдаа дараах материалыг бүрдүүлсэн байна. Үүнд:

- Иргэний үнэмлэх /ахлагчийн үнэмлэх/;
- ЭЕШ-ын батламж;
- Боловсрол эзэмшсэнийг гэрчлэх баримт бичиг;
- Сурагчийн хувийн хэрэг;
- БХЯ, ЗХЖШ-ын зөвшөөрөл, анги байгууллагын тодорхойлолт /зөвхөн ахлагч нарт хамаарна/;
- 3x4 хэмжээний цээж зураг 4 хувь;
- Төгссөн сургуулийн тодорхойлолт;
- Системээс илгээсэн бүртгэлийн хуудас;
- Өөрийн суралцах бэлтгэл, авъяас чадвар, туршлага, хувийн зан чанар, хэрхэн суралцахаа илэрхийлсэн эссе бичлэг /ҮБХИС-ийн элсэлтийн цахим хуудсанд байршуулсан загварын дагуу/;
- ҮБХИС-д элсэн суралцахыг хүссэн өргөдөл зэрэг материалуудыг битүүмжлэл сайтай хавтсанд хийж бүрдүүлсэн байна.

5.4. Элсэгч нь “ҮБХИС-ийн дүрэм”-д заасан суралцагчдад тавигдах шаардлагын дагуу Аюулгүй байдлын сургуулийн захирал, Эрдэм шинжилгээ, сургалтын албатай “Суралцах гэрээ” байгуулна.

#### Зургаа. Бусад

6.1. Сургалтын нэг хөтөлбөрөөс нөгөө хөтөлбөрт шилжин суралцах асуудлыг зөвхөн нэгдүгээр дамжааны эхний хагас жилийн хөтөлбөрийг бүрэн хангасан тохиолдолд анги дэвших тушаал гарахаас өмнө шийдвэрлэх ба суралцах эрхийг бусдад шилжүүлэхийг хориглоно.

6.2. Ахлагчийн сургуулийн мэргэжлийн боловсрол олгох хөтөлбөрт орон нутгаас тэнцсэн элсэгчид:

- 7 дугаар сарын 22,23-ний өдөр Улаанбаатар хотод хүрэлцэн ирж ҮБХИС-ийн элсэлтийн комисст бүртгүүлнэ.
- 7 дугаар сарын 24,25-ны өдөр Цэргийн төв эмнэлгийн цэргийн нарийн мэргэжлийн эмч нарын эрүүл мэндийн үзлэгт хамрагдана.

- 7 дугаар сарын **31**-ны өдрөөс 8 дугаар сарын **30**-ны өдрийг хүртэлх хугацаанд цэргийн анхан шатны бэлтгэл сургалтад хамрагдаж, цэргийн тангараг өргөнө.
- 6.3. Монголын их, дээд сургуулиудын консорциумын элсэлтийн комиссоос бакалаврын хөтөлбөрт суралцах эрхийн бичиг авсан орон нутгаас тэнцсэн элсэгчид **08** дугаар сарын **20-23**-ны өдрүүдэд ажлын цагаар **/9.00 – 17.00 цагт/** ҮБХИС-д өөрийн биеэр ирж бүртгүүлнэ.
- 6.4. Элсэгчид сургалтын төлбөрөө бүрэн төлсөн тохиолдолд “Cloud university” системд бүртгүүлэх эрх нээгдэж ҮБХИС-ийн оюутны код, үнэмлэх авах боломж бүрдэнэ.
- 6.5. Суралцах эрх авсан боловч заасан хугацаанд хүндэтгэн үзэх шалтгаангүйгээр системийн бүртгэлд бүртгэлээ баталгаажуулаагүй элсэгчийг суралцахаас татгалзсан гэж үзэн суралцах эрхийг хүчингүйд тооцно.
- 6.6. Элсэлтийн цахим хуудас нь тогтмол ажиллагаатай нээлттэй үйлчилж элсэлттэй холбоотой мэдээллээр бүртгүүлэгчдийг хангана.
- 6.7. Элсэгчдэд бүрэлдэхүүн сургуулиуд хөтөлбөрүүдээ танилцуулах, зөвлөгөө өгөх үйл ажиллагааг зохион байгуулна.
- 6.8. ҮБХИС-д суралцах нөхцлийг хангасан “Бакалаврын зэргийн диплом”-той элсэгчдийг суралцуулах асуудлыг “ҮБХИС-д дээд боловсролын бакалаврын зэрэг олгох журам”-ын 4.10.2 дэх заалтыг үндэслэн хэрэгжүүлнэ.

## ҮНДЭСНИЙ БАТЛАН ХАМГААЛАХЫН ИХ СУРГУУЛЬ